

## BREÂRS CATOLICS

*Siôr Diretôr,*

*mo cà, mo là, a si sint a dî, como una granda nuvitât,  
che qualchi predi al va a balà ...*

*Forsit par capî miôr i problemas dai zòvins?!*

*Mi pâr di vê let di cualchi bande che il Vescum, inrabiât, al à  
inproibît la «Danza ai sacerdotos».*

*Inproibida o no, esal chest il moment just pai predi di balâ?*

*Ce puedino pensâ via pa l'Italia?*

*L. L. - Davar*

Ce che jê e dîs in merit dal befel dal vescul, e jè vere: lu à scrit. E alore, cence volê insegnâj il mistîr, mi tocje disij che nol cognos nancje i siei predi. Bastave ch'al ves cjapade in man la tabele dai nons par capî che no podeve vê mani une robe dai gjenar. Par cuistions di etât: a son dibot duc' parsore dai cincuant! Se podopo un o doi e àn fat cuatri sgrups, alore al è dome un rinpîn par cjapâse cun chêi, fasint fâ brute figure a dute la conclave, come ch'a fossin une bande di pacjochelis e di purcinei che àn tal cjâf dome di passi il voli e di distraisi. Tant plui che il bal, in fonz, al è il mâl plui piçul ch'al seti e jê s'a è une persone oneste e libare e nete e scuèn dâmi reson. And'ere âtris pecjâz, plui pelôs, che il vescul al vares vût di tirâ fûr sui siei predi, come par esenpli l'inbrojâ, il parâ dongje bêz a pitinton, lis trajnis cui pulitics, e soregut il tasê cuanche un popul al ven sassinât. Atrichè breârs!

Ma la robe e jè un'âtre. No ce ch'a fasin i predi, ma parcè che lu fasin. E o vores fâj lei al vescul cheste flabute di Fedro (III, 3) che salacôr no le à lete o capide par vie ch'a è un ninìn sauride.

### ESÒPO E IL BACAN

Un bacan al veve un biel trop di pioris e al viodè, cun spavent, che j nassevin i agnêi cul cjâf di frut. Al volè savê il parcè. Un j disè: «Secont me, al è un spiêli! Cuissà ce che ti sucedarà!» Un âtri: «La to femine no ti è fedêl e chest al è un cjastîc!» Ognun al contave la sô e il biât omp nol durmive plui nancje di gnot pal pinsîr. Ma Esòpo, ch'al veve nâs fin, j disè tune orêle: «Se no tu ûs che si ripeti ancjmò chest fat, maride i tiei pastôrs!»

Capissie Siore? Fintremai che chest vescul nu ur insegnarà ai siei predi, a peraulis e soregut cui faz, a innamorâsi de lor int e a maridâ pe vite e pe muart il popul che Diu ur à dât, cun duc' i siei problemas umans e cristians, inpen di lâ a inscjaipulâsi a Udin

scjanpant dai paîs, al è zà furtunât se chêi si contentin di cuatri sgrîps  
o di viodi un toc di cuesse di mange che baline sun tun linsûl di cine.

Fevrâr 1979

Pre Antoni Beline